

# A Casa Rossa

A fà la rossa ùn sò  
mattoni nè coppi, issa casa,  
nè camini nè fucò  
à tene la sempre calda

Sò li canti è l'idee  
cose dette in chì ci crede  
quellu ch'hè venutu à sparte  
sò centu manere d'arte

A fà la rossa hè puru  
chì da sopr'à ogni muru  
ci si possinu affissà  
un ritrattu o un pensà

Ghjè chì, essendu di paese  
o stranieru, sò accese  
e luce à dì li « fà ti entre  
nè sfidatu nè niscentre »

Quì ùn ci hè chè stonde à vive  
inseme à cuntrasti è à rise  
ùn ci hè chè mondi da rifà  
da meziornu à l'annuttà

A fà la rossa sò ghitarre  
à note arrughjunate o spare  
parole di sensu o di fondu  
à girà ti u core più tondu

E chjachjarate à tè à mè  
è un tazzinu di caffè  
sò l'addunite d'una volta  
u tempu d'inventà chì volta

A fà la CASA sò li gesti

di qualchissia è po di questi  
chì sò per sente è per prupone  
chì sò per capì, per cumpone

Sò tanti versi à fà la rossa  
di lingua strana o lingua nostra  
è per ogni la so chjappella  
hè nata quì una paghjella

A fà la calda sò memorie  
di tante ghjente è tante storie  
ch'ella ti conta à l'accasà :  
ci hè solu una porta à puntà ...